

詩
經
類
考

詩經類考卷之七

明武塘沈萬鈞仲容采輯

列國考

周南召南

釋名云周地在岐山之南其山四周也○史記正義
太王居周原因號曰周○鄭譜云周召者禹貢雍州
岐山之陽地名○正義曰禹貢雍州云荆岐既旅是
岐屬雍州也今屬右扶風美陽縣地形險阻而原田
肥美漢書地理志右扶風郡美陽縣禹貢岐山在西
北周文王所居也皇甫謐云今美陽西北有岐城舊

趾是也周召之地其名曰周其召是周內之別名也太王始居其地至文王乃徙于豐周書稱王季宅程皇矣說文王伐密須居岐之陽不出百里則王季居程亦在岐南程是周地之小別也豐在岐山東南三百餘里文王旣遷於豐而岐邦地空故分賜二公以爲采邑也○一統志陝西鳳翔府岐山縣在府城東五十里古岐周地周原在岐山縣東北四十里○韓詩詁云二南地在南郡南陽之間○公羊傳自陝而東者周公主之自陝而西者召公主之○摯虞曰古之周南今之洛陽召公居西卽雍縣召亭雍與洛皆

周之東土○傳氏曰二南之國始於文王之分岐成
於武王之分陝而其詩定于周公之作樂○孔氏曰
春秋時周公召公存本周召之名非復岐周之地○
傳氏曰召自分陝後徙於王屋○曹氏曰繫之周公
則由雍州以至荆楊東南之域也繫之召公則由岐
山以至梁益西南之域也○予朱子謂文王治豐以
岐周舊地分周召周召者采邑之名周公掌內治召
公掌諸侯之治化皆南被故曰二南王質曰周召官
也自二公爲之周公封魯召公封燕元子世之其次
子不改舊官春秋時周公召公是也此詩當是此地

所採南樂歌名鼓鍾之詩曰以雅以南季札觀樂有
舞南籥者二南之籥也文王世子有胥鼓南則南之
爲樂古矣衛宏之言南也曰化自北而南也詩輯曰
文王之國東北近紂都西北迫犬戎故化獨南行今
二南之詩有江沱漢汝而無齊衛鄘晉不爲無據然
是時紂猶在上文王僅得以身受命爲西伯召公安
得亦稱伯况大統未集周雖爲陝陝外未盡爲周周
雖徇限陝而分治之召公亦撫蒞何地甘棠之詠疑
在國燕之後耶於是時也周之德化純被天下無復
此疆彼界矣麟趾騶虞豈復限隔何地而云爾耶此

不知南之爲樂故也蓋周公因太師所採而作樂因地爲樂故名曰南則南之爲樂彰彰明矣呂氏春秋曰禹巡省南土塗山氏之女候禹於塗山之陽乃作歌曰候人兮猗實始作爲南音二南之所由來乎○孔子讀詩曰吾於周南召南見周道之所以盛也孔叢子○周召二十五篇唯甘棠與何彼穠矣二篇乃武王時作武王伐紂乃封太公爲齊侯命周召爲二伯而穠矣云齊侯之子甘棠云召伯所茇故知二篇皆武王時作註疏

周

姬旦謚爲周文公既侯伯禽于魯而次子世爲周公
食采雍之周城夾輔王室保釐東郊註禮者以爲君
陳也父子君臣世濟其美東遷之後易采汝洛○桓
公五年鄭伯不朝王以諸侯伐鄭鄭禦之王爲中軍
虢公林父將右軍蔡衛屬焉周公黑肩將左軍陳人
屬焉王卒大敗○十八年周公欲弑莊王而立王子
克辛伯告王遂與王殺周公黑肩王子克奔燕初子
儀有寵于桓王桓王屬諸周公辛伯諫曰並后匹嫡
兩政耦國亂之本也周公弗從故及○僖公九年周
公會齊侯及諸侯盟于葵丘王使宰侯賜齊侯胙○

二十四年賴叔桃子奉太叔以狄師伐周大敗周師
獲周公忌父原伯毛伯富辰○三十年王使周公閱
來聘饗有昌歜黑白形鹽辭曰國君文足昭也武可
畏也則有備物之享以象其德薦五味羞嘉穀鹽虎
形以獻其功吾何以堪之○文公十四年頃王崩周
公閱與王孫蘇爭政故不赴周公與王孫蘇訟于晉
王叛王孫蘇而使尹氏與聃啓訟周公于晉趙宣子
平王室而復之○成公十一年周公惡楚惠襄之偪
也日與伯輿爭政不勝怒而出及陽樊王使劉子復
之盟于鄆而入三日復出奔晉王旣復之而復出所

以自絕于周也

召

召姬姓伯爵國在王畿內雍縣東南今王屋縣皇甫
謐云召公奭文王庶子康王時考終百有餘歲長子
受封于燕而別子食采岐山之西東遷後易采河南
世世輔王室召穆子則其十六世孫也厲王行暴虐
國人謗王召穆公虎諫曰民不堪命矣語詳世紀國
人襲叛王王出奔彘太子靜匿召公之家國人圍之
召公乃以其子代王太子太子得脫周公召公二相
行政號曰共和共和十四年厲王死于彘太子靜長

於召公家二相共立之是爲宣王○左傳僖公十一年王使召武公賜晉惠公命宣公十五年王召蘇與召氏毛氏爭政使季捷殺召戴公及毛伯衛卒立召襄成公八年王使召桓公來賜魯公命○昭公二十二年景王崩旣葬王子朝因舊官之喪職秩者與景靈之族以作亂逐劉子單子王子還與召莊公謀殺單子二十六年召伯盈逐王子朝王子朝及召氏之族毛伯得尹氏固南宮歸奉周之典籍以奔楚召伯逆王於尸及劉子單子盟○二十九年三月京師人殺召伯盈尹氏固及原伯魯之子○史篇召公名醜真

豈其字耶抑二字相混耶焦氏筆乘國風終於美周公二雅終於思召公蓋傷衰亂之極明非周召不能救也

附燕

風俗通召公奭與周同姓武王滅紂封召公于燕成王時入據三公出爲二伯壽九十餘卒九世稱侯八世稱公十世稱王○列國史補云燕四十二代有二惠侯二釐侯二宣侯三桓侯二文侯蓋國史微失本謚故重耳自召公以下九世至惠侯惠侯當周厲王奔彘共和之時惠侯卒傳釐侯頃侯衰侯鄭侯繆侯宣侯桓侯桓侯卒子莊公立莊公十二年齊桓公始

伯二十七年山戎來侵齊桓公救燕北伐山戎而還
燕君送桓公出境桓公因割燕所至地予燕使燕共
貢天子如成周時職使燕復修召公之法三十三年
卒子襄公立傳桓公宣公昭公武公懿公惠公惠公
多寵姬公欲去諸大夫而立寵姬宋大夫共誅姬宋
惠公懼奔齊齊高偃如晉請共伐燕入其君晉平公
許與齊伐燕入惠公惠公至燕而死燕立悼公悼公
傳其公平公簡公獻公孝公成公湣公僖公桓公文
公文公卒太子立是爲易王此燕稱王之始也王卒
子噲立屬國子之國大亂齊王使章子將五都之兵

伐燕取子之醢之殺王噲燕人立太子平是爲昭王
用樂毅復七十餘城薨子惠王立卒子孝王立卒子
喜立爲秦所滅○古史曰燕國於蠻貊之間禮樂微
矣春秋之際未嘗出與諸侯會盟至于戰國亦以耕
戰自守安樂無事未嘗被兵文公二十八年蘇秦入
燕始以縱橫之事說之自是兵交中國無復寧歲六
世而亡

邴邴衛

鄭氏譜謂成王旣黜殷命殺武庚復伐三監更于此
三國建諸侯以殷餘民封康叔於衛使爲之長康叔

疏曰三年滅三監七年始封康叔書傳云四年封後世子孫稍并彼二國混而名之七世至頃侯當周夷王時衛國政衰變風始作作者各有所傷從其國本而異之爲邶鄘衛之詩焉○孔氏曰頃公之惡邶人刺之則頃公以前已兼邶及鄘或亦然矣周自昭王以後政教陵遲諸侯或強弱相陵故得兼彼二國混一其境同名曰衛也此殷畿千里不必邶鄘之地止建二國也或多建國數漸并于衛○程氏曰諸侯擅相侵伐衛首并邶鄘之地故爲變風之首補傳曰邶古作鄘邶鄘衛皆以水得名邶水在太山之阜鄘水

出宜蘇山衛水在靈壽卽真定○懿王時齊風始變
夷王時衛風始變厲王時陳風始變周召共和唐風
始變宣王時秦風始變平王時鄭風始變惠王時曹
風始變○朱氏曰衛本都河北朝歌之東淇水之北
百泉之南故都卽今衛縣今懷衛澶相滑濮等州開
封大名府界皆衛界也○呂氏曰衛自康叔受封至
君角凡四十世地理志成公徙于帝丘今濮陽是也
秦徙之於野王今懷州始皇旣并天下猶獨置衛君
二世時乃廢凡九百年最後絕九域志大名府古觀
扈國亦商舊都○邶鄘衛三風聖人錄變風而皆首

之以正垂訓深且遠哉一以見變之皆本于正而令人勸一以見正易流於變而令人懲是故邠首柝舟鄘首柝舟衛首淇澳○衛懿公之時有臣弘演者受命而使未反而狄人攻衛于是懿公欲與師迎之其民皆曰君之所貴而有祿位者鶴也所愛者官人也亦使鶴與官人戰余安能戰遂潰而皆去狄人至攻懿公於熒澤殺之盡食其肉獨舍其肝弘演至報使于肝辭畢呼天而號哀止曰若臣者獨死可耳於是遂自刎出腹實內懿公之肝乃死桓公聞之曰衛之亡也以無道也今有臣若此不可不存于是復立衛

楚丘○安成劉氏曰綠衣燕燕等詩莊姜自作共姜
作栢舟桑中言沫邦皆正作於衛國而或係邶或係
鄘泉水載馳皆作於外國而一係邶一係鄘一係衛
意太師各從得詩之地而係之也其所以必係邶鄘
者無乃欲寓興滅繼絕之心如春秋昭公八年楚既
滅陳而九年經書陳災穀梁以爲存陳亦此意也是
以太師存邶鄘之名置于衛前亦如魏風先于唐之
例夫子存其名而不削因其序而不革耳○通典曰
衛州新鄉縣西南三十二里有鄘城卽鄘國也古或
作庸本庸姓之國卽孟庸之所自出漢有庸光及膠

東庸生其後也國亡後以姓爲氏紂都河北栢舟在
彼中河則楚丘鄘境在南明矣沫邦于諸侯屬鄘酒
誥命康叔明大命于沫邦注云紂都所處康叔爲其
連屬之監是康叔并監鄘也蓋邶鄘滅于管蔡而音
存焉其音非衛所能亂今楚丘城在河南濟河之間
俗近齊聲此其所以別于衛也與○地理志曰河內
本殷畿內方千里之地在禹貢冀州太行之東北踰
衡漳東及兗州桑土之野周既滅殷分爲三國邶以
封紂子武庚鄘管叔尹之衛蔡叔尹之謂之三監故
書序曰武王崩三監叛周公討之盡以其地封弟康

叔號曰孟侯以來輔周室遷邶鄘之民于維維邑故三國之詩相與同風左傳祝佗曰分康叔封畛土略自武父以南及圃田之北境都于殷墟則邶鄘屬其中矣邶詩曰在浚之下鄘曰在浚之城邶又曰亦流于淇河水洋洋鄘曰送我淇上在彼中河衛曰瞻彼淇澳河水洋洋故吳公子札聘魯觀周樂聞邶鄘衛之歌曰美哉淵乎吾聞康叔之德如是是其衛風乎衛一也而有邶鄘衛之分說者謂其聲異也然則孔子之刪詩大抵得其鄉聲則存也周列國如滕薛如燕蔡如邾莒等國夫豈無詩但不識其音則不得其詳

不欲強備耳。狸首翹翹車乘之詩不皆存見矣。○邶
本三監地也。逸周書作維曰俾康叔宇於殷。俾中旄
父宇於東。注東謂衛也。康叔代霍叔。中旄代管叔。卽
南宮旄名仲突者八士之一也。蔡叔不言所代以其
子仲克祇庸德。周公以爲卿士。封諸淮汝耳。殷俗靡
靡。周雖化革其俗。然風尚不盡變。雖武王周公之時
頑民後革。及昭王以後。政教陵遲。諸侯或強弱相凌。
故得兼彼二國。然紂都城北爲邶。南爲鄘。東爲衛。其
風固不易也。作維之後。遷邶鄘之民于洛邑。其地盡
爲康叔封國。有可稽者。惟劉向列女傳衛宣夫人自

誓不與其君之弟同庖則可疑耳君既死入國安得稱夫人宋李迂仲以爲宣姜是向目淫爲貞也必不然然竹書紀年曰晉定公二十八年淇絕於舊衛則是衛都嘗遷而有新舊也豈舊衛有君亦謚爲宣非康叔之後乎然地理志曰齊桓公更封衛于河南曹楚丘而河內殷墟更屬於晉定公立在敬王時則河內恐卽舊衛邶地宣姜正居舊衛豈以其子文公之故衛人爲之飾其惡歟其不可知者如此○衛世家云康叔卒子牟伯立事周康王爲大夫卒子考伯立卒子嗣伯立卒子遑伯立卒子靖伯立卒子貞伯立

卒子坎伯立卒子釐侯立四十二年卒子共伯余耳
爲君共伯弟和襲攻共伯于墓上共伯自殺衛人立
和爲衛侯是爲武公武公卽位修康叔政百姓集五
十年卒子莊公揚立二十三年卒太子完立是爲桓
公二年第州吁驕奢桓公黜之十六年州吁襲殺桓
公而自立九月衛人使右宰醜泄殺州吁于濮迎桓
子晉于邢而立之是爲宣公十九年卒太子朔立是
爲惠公左公子洩右公子職不平朔之立也四年奔
齊立公子黔牟黔牟立八年惠公復入放黔牟而卽
位三十二年卒子懿公赤立淫于樂好鵠鶴有乘軒

者九年爲狄所滅立昭伯頑之子申是爲戴公以廬
于漕元年卒立弟燬是爲文公時齊桓公率諸侯伐
翟爲衛城楚丘文公當滅亡後大布之衣大帛之冠
務材訓農通商惠工敬教勸學授方任能至革車三
百乘二十五年夏四月癸酉卒成公鄭立三十五年
卒子穆公速立十一年卒子定公臧立以敬嬖之子
衎爲太子是爲獻公國亂出奔以定公弟剽當國是
爲殤公爲甯子所殺并及剽子角獻公復入三十三
年卒子襄公惡立九年卒襄公夫人姜氏無子以嬖
人媯嬀所生子元立是爲靈公寵夫人南子而逐蒯

賁卒夫人欲立公子郢郢不從立亡人之子輒是爲
出公十二年孔慍立蒯賁是爲莊公石圃之難爲已
氏所殺輒復自齊歸復奔宋季父黔攻出公子而自
立是爲悼公五年卒子敬公弗立十九年卒子昭公
糾立是時三晉強衛如小侯屬之昭公六年公子亶
弑之代立是爲愼公愼公父公子適適父敬公也愼
公四十二年卒子聲公訓立十一年卒子成侯速立
周列王二十三年衛貶號曰侯服屬三晉成侯立二
十九年卒子平侯立八年卒子嗣君立衛更貶號曰
君獨有濮陽立四十二年卒子懷君立三十一年朝

言類卷之六
魏魏囚殺之更立嗣君弟是爲元君元君爲魏壻故
立之十四年秦拔魏朝歌及魏濮陽衛徙居野王二
十五年元君子君角立君角九年而秦始皇始并六
國二十一年秦二世廢君角爲庶人初秦并天下而
衛獨存至是衛乃絕祀○太史公曰余讀世家言至
於宣公之太子以婦見誅弟壽爭死以相讓此與晉
太子申生不敢明驪姬之過同俱惡傷父之志然卒
死亡何其悲也或父子相殺或兄弟相滅亦獨何哉
○古史曰衛之大亂者再皆起于父子夫婦之際宣
公靈公專欲以興禍固無足言者伋子壽子爭相爲

死而莊公出公父子相攻出入二十餘年不以爲恥
賢愚之不同至此哉然伋壽勇于義惜其不爲吳太
伯而蹈申生之禍以重父之過可以爲廉矣未得爲
仁也昔者季路高柴皆事出公孔子自陳反於衛子
路問曰衛君待子而爲政子將奚先子曰必也正名
乎嗚呼衛之名于是可謂不正矣靈公斥其子而子
其孫出公不父其父而彌其祖人道絕矣孔子于是
焉而欲正之何爲而可靈公之死也衛人立公子郢
郢不可則衛人立輒使輒而知禮必辭辭而不獲必
逃輒逃而郢立則名正矣雖以拒蒯瞶可也雖然孔

子爲政豈將廢輒而立郢耶其亦教避位而納蒯瞶耳蒯瞶得罪于父生不養死不葬然于其入也春秋書曰趙鞅帥師納衛世子蒯瞶于戚非世子而以世子名之以其子得立于衛成其爲世子也若輒避位而納其父是世子爲君也而名有不正乎名正而衛定矣

王

譜曰王者周東都王城畿內六百里之地始武王作邑于鎬京謂之宗周是爲西都成王欲宅營洛邑使召公先相宅旣成謂之王城是爲東都今河南是也

召公既相宅周公往營成周今洛陽是也成王居洛
遷殷頑民於成周復還處西都至十一世幽王爲犬
戎殺于戲晉文侯鄭武公迎宜臼于申而立之是爲
平王以亂故徙居東都王城于是王室之尊與諸侯
無異自平王以下十二王皆都王城至敬王乃遷都
成周赧王又居王城○呂氏曰成周乃東都總名河
南成周之王城也洛陽成周之下都也平王東遷之
後所謂西周者豐鄠也所謂東周者東都也威烈王
之後所謂西周者河南也所謂東周者洛陽也考王
封弟揭河南續周公職是爲河南桓公王城故地威

烈嗣位西周惠公封少子班於鞏以奉王實東周惠公此東西周分之始也東周王所居洛陽也鞏班之采邑也顯王二年趙與韓分周爲二東西周各爲列國顯王雖在東周特建空名于上耳自是而後凡征伐謀策稱東西周君者皆謂二周君也周本紀云赧王時東西周分治非也赧王特徙都西周耳○吳氏曰王謂王城之地王人王號之說皆非也威烈王後東西二周公輔王皆姬且之後至于赧王猶爲天子然逖債竊鈇夷于齊民矣戰國策始于西周武公注誤以爲赧王別謚東周君次之及秦滅赧王宋南宮

靖一遂升東周君繼赧王之統其謬如此○漢書地理志云初洛邑與宗周通封圻東西長南北短短長相覆千里韋昭云通在二封之外共千里也臣瓚按西周方八百里八八六十四爲方百里者六十四東周方六百里六六三十六爲方百里者三十六方百里者百此方千里也○張子曰王次衛者恐混於二南故以三衛間之○東遷之後國地狹於千里故次之于衛又衛有狄難未幾復振周以犬戎遂致陵夷故次之加之王尊周亦愧周也○平王微弱詩不能復雅固矣厲王流于彘幽王滅于戲何以在雅曰幽

厲雖無道然禮樂征伐猶在其手也豈如平王微弱
政在諸侯威令不加于百姓乎○黃氏櫛曰吁是豈
吾夫子之心哉夫子作春秋書王正月書天王序王
於諸侯之上所以尊周室而使天下知有王也而乃
復於詩而降之乎蓋黍離之爲國風自周太師采詩
之時已然矣而非孔子名之也周室未遷則其聲天
下之正聲也平王遷而東之則其音東土之音耳而
非天下之正音也故曰王國風豈以王不正而據降
之哉孟子曰詩亡然後春秋作胡氏謂自黍離降爲
國風天下不復知有雅春秋作于隱公適當雅亡之

後文中子則以爲詩者人之性情性情不應亡使孟子復生必從斯言范甯穀梁序孔子就太師正雅頌因魯史修春秋列黍離于國風齊王德于邦君明其不能復雅政化不足以被羣后也然左傳襄二十九年季札觀樂於魯已爲之歌王矣孔子至哀十一年始自衛反魯正雅頌各得其所則降王于國風非孔子也○焦氏筆乘曰詩亡非獨雅詩亡風雅頌俱在其中河汾王氏窺見此意直以春秋詩書同曰三史義深矣天子五年一巡狩命太師陳詩以觀民風自昭王膠楚澤之舟穆王廻徐方之馭而巡狩迹絕諸

侯豈復有陳詩事哉民風之善惡旣不得知見于三百篇者多東遷以後之詩無乃得於樂工所傳誦而已至夫子時傳誦者又不可得益不可以盡著諸國民風之善惡然後因魯史以倘載諸國之行事不待褒貶而善惡自明故詩與春秋體異而用則同○又曰詩亡解者謂黍離降爲國風而雅亡是不然風之與雅體制不同若今詩所謂選也律也歌與曲也試寘黍離于二雅之中聲果同乎倘以平王政教不行降雅而爲風則正月之篇赫赫宗周褒姒滅之幽王以後詩也反列于雅何哉故其聲風也卽二南亦系

之風其聲雅也卽正月亦系之雅正不以此爲升降也○以王風而屈于列國之中故春秋以春王正月而伸於列國之上是伸也所以救是屈也○許氏曰西都數百年而無風也蓋有雅以道天下之故則無事于采風雅旣亾則取民間之詩以紀政俗王風十篇忝離爲大夫行役餘皆民間詩也蓋雅必出于朝廷風則下之歌咏古有定制或上可兼下下不可僭上也是以東征之事大于獫狁之役而東山勞歸之詩不在采薇出車之列雖出于變亦不與六月采芑同什也此見風雅之體不可易置矣○黃氏曰忝離

之爲國風以其詩之體爲風也周室未遷則其聲天下之正聲也平王遷而東之則其音乃東土之音耳故曰王國風○李太白詩曰大雅久不作吾衰竟誰陳王風委蔓草戰國久荆榛龍虎相啖食干戈遠在秦正聲何微茫哀怨起騷人蓋春秋之後屈原作離騷不風不雅而比興之體益變矣漢世又變爲樂府五言七言由是漸興至千六朝文尚排偶而詩亦爲排律謂之王風且不可而淫哇之聲自擬大雅者有之此李白所以嘆咤者也○先正有云春秋之初周可以興而不興周之罪也春秋之後周可以亾而不

亡周之幸也斯言也其有所感也夫○詩緝正始之
化行則以周變商周之所以王而積風爲雅也衰亂
之俗勝則反周而商周之所以東而雅降爲風也王
風次衛著盛衰之變也○陳氏曰鎬京謂之宗周以
其爲天下所宗也洛邑謂之東都又謂之成周以周
道成于此也洛邑天下之至中豐鎬天下之至險于
洛邑定鼎以朝諸侯宅土中以准四海其示天下也
公于鎬京定鼎以據形勝處上游以制六合其慮天
下也遠漢唐並建兩京蓋亦深識天下形勝之所在
而有得于成王周公之遺心歟○鄭譜王之封域在

禹貢豫州太華外方之間北得河陽漸冀州之南○
地里志周地今之河南洛陽穀城平陰偃師鞏緱氏
是也昔周公營洛以爲在于土中諸侯蕃屏四方故
立京師至平王東遷襄王以河內賜晉文公又爲諸
侯所侵故其分地小○朱仲晦云周地今河南府及
懷孟等州是○名物疏河南縣今廢在河南河南府
城唐苑內城西有郊鄆陌卽定鼎地洛陽故城在河
南府城東洛水北懷州今爲懷慶府孟縣宋孟州也

鄭

史記魏築長城自鄭濱洛今州東三里魏長城是也

秦紀武公十一年初縣鄭譜曰初宣王封母弟友于宗周畿內咸林之地是爲桓公今京兆鄭縣是其都也爲幽王大司徒懼及于難問太史伯曰何所可以逃死史伯曰其濟洛河瀕之間乎是其子男之國號鄆爲大號叔恃勢鄆仲恃險皆有驕奢怠慢之心加以貪冒君以周難之故寄帑與賄不敢不許是驕而貪必將背君君以成周之衆奉辭伐罪無不克矣若克二邑鄆蔽補丹依疇歷華君之土也

韋昭曰八邑孔氏曰

脩典刑以守之唯是可以少固桓公從之後三年幽王爲犬戎所殺桓公死之其子武公與晉文侯定

平王於東都王城卒取史伯所云十邑之地右洛左
濟前華後河食溱洧今河南新鄭是也及成皐榮
陽潁川之崇高陽城皆鄭分戰國策韓之取鄭從成
皐始林氏曰春秋戰爭之多者無如鄭戰國戰爭之
多者莫如韓秦漢之間天下有變必於滎陽成皐之
間決勝負滎陽故東虢國有京水索水楚漢戰于京
索之間是其地也○註疏鄭東周畿外之國畿內之
國非正南面之君政教稟於天子善惡歸於其上無
假風諫不當有詩鄭國見有變風不在畿內明矣鄭
因虢鄭之國自然亦在畿外鄭發墨守云桓公國在

宗周畿內武公遷居東周畿內者以鄭與西周本在
畿內西都之地盡以賜秦明武公初遷亦在東周畿
內故歷言之也及并十邑鬱成大國盟會列于諸侯
灼然在畿外矣○郡縣志新鄭縣本有熊氏之墟又
爲祝融之墟於周爲鄭武公國都韓哀侯滅鄭自平
陽徙都之秦爲潁川郡漢爲新鄭縣屬河南郡隋重
置屬鄭州○京索京卽京城太叔之邑索有大索城
小索城○鄭之制邑卽漢之成臯虎牢胡氏春秋傳
曰虎牢鄭地故稱制邑今爲汜水縣巖險聞于天下
猶虞之下陽趙之上黨魏之安邑燕之榆關吳之西

陵蜀之漢樂地有所必據城有所必守而不可以棄焉者也○地理志穆天子傳七萃之士生捕虎卽獻天子天子畜之東號號曰虎牢○十三國中惟鄭聲淫則鄭地之惡極矣而其詩中人才無一不備若緇衣賢公卿也羔裘賢大夫也雞鳴賢夫婦也出其東門賢士庶也此見習俗不能移人而生才未嘗擇地○嚴氏曰鄭在東遷畿內風所以次于王也○吳季札聞鄭之歌曰其細已甚民弗堪也是其先公乎自武公後二十三世爲韓所滅土陘而險山居谷汲男女亟聚會其聲之淫有甚于衛者子夏曰鄭音好濫

淫志春秋列國時皆好之鄭以女樂賄晉而悼公之志怠魏絳是以有居安思危之規又以淫樂矇瞽賂宋而師蕙謂宋無人焉趙烈侯好鄭音賜歌者田番吾君進言止之夫子惡其亂樂有以也左傳昭十六年晉范宣子聘鄭鄭六卿餞宣子宣子請賦子韞賦野有蔓草子太叔賦褰裳子游賦風雨子旗賦有女同車子柳賦籊兮若皆淫奔之詩諸子者何爲不諱於客乎不然則諸子之志荒矣或曰以聲不以詞夫子謂鄭聲淫季子謂其細已甚皆聲音之謂也蓋放蕩而無歸宿則微細而淫哇故曰志微噍殺之音作

而民思憂流辟邪散逖成滌濫之音作而民淫亂○
吳氏曰齊詩刺哀襄而季札觀樂乃曰泱泱乎大風
也哉鄭美武公父子而札乃曰其細已甚曰大曰細
自其土地風氣之發於音聲者言之而非係乎詞也
班孟堅曰民性剛柔緩急音聲不同係水土之風氣
故劉夢得論八音與政通以三光五岳之氣爲言固
有見乎此

世次

鄭自桓公友始受封周厲王少子而宣王庶弟也幽
王八年入爲司徒其後犬戎弑幽王驪山下并殺桓

公鄭人共立其掘突是爲武公當平王時亦爲周司徒善於其職詩所爲賦緇衣也公娶于申曰武姜生莊公及其叔段莊公寤生驚姜氏故名曰寤生遂惡之愛其叔段欲立之亟請于公公弗許時武公在位二十七年矣卒寤生立是爲莊公叔段亂命公子呂帥車二百乘伐京大叔出奔其莊公亦爲平王卿士王貳于虢故周鄭交質交惡桓王時始朝周立四十二年卒子突立爲厲公祭仲與宋人盟也故舍世子忽而立突突患祭仲專欲殺之不得遂出奔蔡世子忽復歸鄭立爲昭公爲高彌牟所弒而立公子亶齊

首止之師殺子臺祭仲逆鄭子于陳而立之爲子儀
子儀十四年厲公復入二十八年卒子文公捷立三
十五年天王出居于鄭四十五年文公捷卒子穆公
蘭立姑姬夢蘭而生刈蘭而卒子靈公夷立爲子公
子家所弑鄭人立襄公堅靈公弟也十八年卒子悼
公費立二年子成公踰立十四年卒子髡頑立是爲
僖公不禮于子罕子駟駟使賊夜殺僖公而以瘞疾
計于諸侯簡公嘉生五年奉而立之三十六年卒子
寧立是爲定公十六年卒子獻公蠆立十三年卒子
聲公勝立三十七年卒子哀公易立八年鄭人弑之

而立聲公弟丑是爲其公二十年卒子幽公立元年
韓武子伐鄭殺幽公鄭人立幽公弟駘是爲繻公二
十四年楚圍鄭二十五年殺其相子陽二十七年鄭
弑其君駘立幽公之弟乙是爲鄭君二十一年韓滅
鄭自陽翟徙都之

太史公曰語有之以權利合者權利盡而交踈甫瑕
是也甫瑕雖以刼殺鄭子內厲公厲公終背而殺之
此與晉之里克何異守節如荀息身死而不能存奚
齊變所從來亦多故矣○古史曰鄭之諸公桓武之
後惟莊公爲賢然其爲人反覆而任數桓武之風衰

馬叔段之亂諸大夫皆欲早爲之所莊公之明足以制之然釋而不問俟其惡成而後加之以大戮此非不忍于弟蓋忍之至也孔子深揆其心故春秋首鄭伯克段於鄆而丘明謂之鄭志蓋謂此也周平王桓王貳於虢公莊公旣質王子取麥禾矣則又率齊而伐之伐宋而說之政不可得於是兵交中原射王左肩鳴呼其伎心發于中卒不可蓋如此鄭自莊公始畏楚穆襄之後無歲不被晉楚之兵子駟子展爲政不知所出惟其來者與之鄭幾於亡及晉悼公三帥諸侯以疲楚師楚不能爭而子產受之以禮自固雖

晉楚之暴不能加焉

齊

齊者古少皞之世爽鳩氏之墟左傳云齊侯飲酒樂
公曰古而無歿其樂何如晏子對曰昔爽鳩氏始居
此地季荊因之有逢伯陵因之薄姑氏因之而後太
公因之古若無歿爽鳩氏之樂非君之願也以爽鳩
始居齊地故云武王封呂望于齊是爲齊太公都營
丘齊世家云太公望呂尚者東海上人也其先祖世
爲四岳佐禹平水土甚有功于虞夏之際封于呂或
封于申姓姜氏尚其後裔也從其封姓故曰呂尚西

伯獵遇太公於渭之陽與語大悅曰自吾先君太公
曰當有聖人適周周興子真是耶吾太公望子久矣
故號之曰太公望載與俱歸而立爲太師受武王封
卒子丁公汲立卒子乙公得立卒子癸公慈母立卒
子哀公不辰立哀公荒淫田遊紀侯譖之周周烹哀
公立其弟靜是爲胡公徙薄姑而哀公之少弟山怨
胡公與其黨率營丘人襲殺胡公自立是爲獻公因
徙薄姑都臨淄卒子武公壽立二十六年卒子厲公
無忌立厲公暴虐故胡公復入齊齊人欲立之與攻
殺厲公胡公亦戰歿乃立厲公子赤是爲文公而誅

殺厲公者七十人立十二年卒子成公說立卒子莊公購立卒子釐公祿父立卒太子諸兒立是爲襄公襄公無道爲無知所弑高國召小白于莒魯侯伐齊納糾使管仲別將兵遮莒道射中小白帶鉤小白佯死仲使人馳報魯魯送糾者行益遲六日至齊則小白已入齊高奚立之是爲桓公遂伯天下桓公卒五公子皆求立初管夷吾以孝公屬宋宋師與齊戰于禚孝公得立十年卒衛公子開方立是爲昭公昭公妃子叔姬生子舍叔姬無寵舍無威公子商人驟施于國而多聚士盡其家貸於公有司以繼之昭公卒

舍卽位商人弑舍而讓公子元元曰爾求之久矣我能事爾爾不可使多蓄恨將免我乎爾爲之商人遂立爲懿公初懿公之爲公子也與邢公之父爭田弗勝及卽位乃掘而刖之而使馱僕納閭職之妻而使職馱乘夏五月公遊于申澗一人洛于池馱以扑扶職職怒馱曰人奪女妻而不怒一扶女何傷職曰與刖其父而弗能病者何如乃謀弑懿公納諸竹中歸舍爵而行齊人立公子元是爲惠公卒子無野立是爲頃公卒子靈侯環立卒光卽位是爲莊公爲崔杼所弑立景公景公靈公子也立五十八年卒子荼立

是爲安孺子爲陳乞所弑立景公子陽生是爲悼侯
卒子壬嗣是爲簡侯陳恒弑之舒州簡侯弟驁立是
爲平侯二十五年卒子宣侯積嗣五十一年卒子康
侯貸嗣十四年田和遷之海上使食一城奉先祀二
十六年齊侯貸卒無子田氏遂并齊而有之○詩緯
曰齊地處孟春之位海岱之間饒於水土利之所聚
其音中角律中太簇○嚴氏曰東遷政令僅行于郊
畿而畿內之鄭亦自爲列國王室之微甚矣于是乎
齊始霸故王鄭之後次以齊也子夏言鄭音好濫淫
志衛音趨數煩志齊音傲辟驕志皆淫于色而害于

德齊亦二南之變也○樂記曰溫良而能斷者宜歌
齊齊者三代之遺聲也齊人識之故謂之齊明乎齊
之音者見利而讓見利而讓義也季札聞齊之歌曰
美哉泱泱乎大風也哉表東海者其太公乎國未可
量也及秦并六國田齊獨後亡豈非風土使然歟○
魏文帝典論論文云徐幹時有齊氣李善註言齊俗
文體舒緩按漢書地理志齊詩如還如著此亦其舒
緩之體又云齊至今其士舒緩濶達而多智案宇記
萊州人志氣緩慢是則齊俗自來舒緩故詩體亦然
○註疏齊武王時地方百里未得薄姑至周公成王

時薄姑氏與四國作亂成王滅之以封師尚父

魏

譜曰魏者舜禹所都之地正義曰地理志云河東郡有河北縣皇甫謐云舜所營都或云蒲坂卽河東縣是也禹受禪都平陽或安邑皆屬河東魏姬姓左傳曰虞虢焦滑霍楊韓魏皆姬姓當周平王之世變風始作春秋閔公元年晉獻公滅耿霍魏以魏地賜大夫畢萬自後晉有魏氏魏地西接秦北鄰晉也又南枕河曲北涉汾水故詩多以河汾爲言吳季札聞歌魏曰美哉泚泚乎大而婉儉而易行以德輔此則明

主也○詩緯曰魏處季冬位其土平夷其音羽角○
齊始霸也晉代興也齊之次在晉而魏乃晉之所滅
也魏之後唐猶邶鄘先衛也魏唐無淫風蓋猶有先
代之遺化焉○蘇氏曰魏地入晉久矣疑皆爲晉而
作然國小無政似非晉事儉嗇褊急與勤儉質朴亦
不同直以爲晉詩不可也又曰檜者鄭所滅也檜詩
不爲鄭而邶鄘爲衛魏爲晉何也邶鄘衛之詩作于
旣滅其詩所爲者衛晉也至于檜詩未亡而先作矣
○慶源輔氏曰寬裕者其流長急迫者其流短魏以
地陬而褊急如此其何以傳世至于長久哉故變風

作於平桓之世而國遂滅於惠王之十七年止五十六年間耳詩人之意固憂之乎○安成劉氏曰先儒以魏所封爲文子畢公高之後○封爵世次未詳

唐

唐者帝堯舊都之地今日太原晉陽是帝堯始居此後乃遷河東平陽成王封母弟叔虞於堯之故墟曰唐侯分以大路密須之鼓闕鞏姑洗懷九族職官五正居古大夏實沈之墟啓以夏政疆以戎索南有晉水至子燮改爲晉侯其封域在禹貢冀州太行恒山之西太原大岳之野至曾孫成侯南徙曲沃近平陽

爲當周公召公共和之時成侯曾孫僖侯甚嗇愛物
儉不中禮國人閔之唐之變風始作其孫穆侯又徙
絳孝侯改絳爲翼云○詩緯曰唐處孟冬之位得常
山太岳之氣其地磽而收其民儉而好畜其音中羽
○季札曰思深哉其有陶唐氏之遺風乎不然何憂
之遠也非令德之後孰能若是桺宗元曰三河古帝
王之更都焉而平陽堯之所理也有茅茨木椽土型
之度故其人至今儉嗇有允恭克讓之德故其人至
今和而不怒有昌言儆戒之訓故其人至今憂思而
畏禍有無爲不言垂衣之化故其人至今恬以愉此

堯之遺風也今按晉滅於曲沃其兆已見於文侯時
矣以書文侯之命考之天子同姓稱伯父叔父今直
稱文侯爲父一則曰父義和一則曰父往哉其卑屈
依怙之意可見矣大雉未報王靈不振當如周公留
相朝廷而侯其子使號召于外與九州方伯連帥戮
力討賊可也文侯亦愿而無立志不建匡復之策啓
發其不共戴天之念何哉奔亡之餘僅得苟安乃釋
然自以爲足遽遣文侯曰歸視爾師寧爾邦則兵已
罷矣曰用賚爾秬鬯一卣彤弓一彤矢百馬四匹則
功已報矣曰往哉柔遠能邁惠康小民無荒寧告以

言終矣
平世之政則軍旅不復講矣曰簡恤爾都用成爾顯
德勉以本邦之治則王室無復事矣文侯歸國泊狀
不聞其闢茸可知也夫以周公忠聖而管蔡猶自流
言况仇之不自強乎此成師之所以包藏禍心也仇
沒未久其子昭侯已遷于翼日以衰微不復朝于王
所而曲沃遂藐其宗國矣武公之後文公稱霸請而
不正召王河陽春秋書狩以諱之不恭不讓效尤成
師故也襄王不綱亦賜文公弓矢傳曰平禮也則又
援文侯之命以爲故事矣周室委靡頽惰而不自振
晉國亦跋扈自安而平安之後不再捍王于艱厥後

權移三卿則恬愉之過也於乎山有樞作迄于采苓
豈復有陶唐深思遠禍之風乎○堯初封唐侯其地
中山唐縣是也堯時處子朱于丹淵爲諸侯故云丹
朱至舜封堯子丹朱於唐夏時朱之裔孫有劉累者
遷于魯縣而其孫猶守故地至商爲豕韋氏周復爲
唐成王滅唐以封弟叔虞而遷唐公于杜降爵爲伯
今長安杜城是也周之季世又封劉累裔孫之在魯
縣者爲唐侯以奉堯祀其地今唐州方城是也傳曰
自虞以上爲陶唐氏在夏爲御龍氏在商爲豕韋氏
在周爲唐杜氏成王滅唐故子孫爲唐氏此晉之唐

也宣十二年楚使潘黨率遊關四十乘從唐侯爲左
拒其地在今隨州唐城縣此楚之唐也定公五年楚
滅唐子孫亦以唐爲氏在晉者仕晉在秦楚者仕秦
楚唐堯之後分爲六唐氏杜氏范氏劉氏韋氏祁氏
皆爲著姓蕃衍不絕吁神明之胄遠矣哉尚書
日記○詩
緝堯都有四地理志太原晉陽注云故詩唐國晉水
所出一也河東平陽注云堯都也在平河之陽二也
中山唐縣張晏注云堯爲唐侯國于此三也河東隰
縣順帝改曰永安臣瓚于晉陽下注云所謂唐今河
東永安是也去晉四百里師古云瓚說是也四也詩

之唐國其說有三詩譜以爲堯始居晉陽後乃居平陽於詩唐國爲晉陽皇甫謐云以爲堯始封于中山唐縣後徙晉陽及爲天子都平陽于詩唐國爲平陽臣瓚又以唐國爲永安今考堯都雖有四而詩之唐國當從詩譜謂晉陽蓋封叔虞叔虞于堯之故墟曰唐侯其子燮以晉水所出改爲晉侯晉陽實晉水所出則唐叔虞之始封在晉陽矣唐以堯得名晉以水得名其地一也○按晉世家唐叔生晉侯燮燮生武侯寧族族生成侯服人成侯生厲侯福福生靖侯宜臼宜臼生僖侯司徒僖侯生獻侯籍籍生穆侯費穆

侯卒弟殤叔自立四年爲穆侯太子仇所殺仇立是
爲文侯三十五年卒昭侯立元年封其叔父成師于
曲沃七年爲大臣潘父所弑子孝侯平立十五年爲
曲沃莊伯所弑子鄂侯卻立六年當魯隱五年卒于
哀侯光立九年爲曲沃武公所虜子小子侯立四年
爲曲沃武公誘而殺之哀侯弟緡立爲晉侯二十七
年曲沃武公伐晉侯緡滅之周僖王命曲沃武公爲
晉君武公已卽位三十七年改國號曰晉二年卒子
獻公詭諸立二十六年卒此其君次也

曲沃傳世武
獻君卓惠惠

卓兄也懷文獻子襄靈成襄弟景房悼悼
襄曾孫平昭頃定出哀昭曾孫幽烈孝靜

○通釋

曰武公能滅晉之宗而不能滅唐之號雖冒晉之號而不能繼唐之統君子欲絕武公于晉而不可故總名其詩爲唐以寓意焉然則晉詩稱唐見曲沃武公滅宗國之罪而魏風首晉又以見曲沃獻公滅同姓之惡世變如此春秋欲不作不可得也

秦

語曰秦隴西谷名於禹貢近雍州鳥鼠山之東北地理志云秦今隴西秦亭谷亭是也昔皐陶之子伯翳佐禹治水有功舜命作虞賜姓曰嬴其末孫非子爲周孝王養馬于汧渭之間封爲附庸邑于秦谷及非

子之曾孫秦仲周宣王又命爲大夫仲之孫襄公討西戎救周周室東遷以岐豐之地賜之始列爲諸侯春秋時稱秦伯崔云秦在虞夏商爲諸侯至周爲附庸○疏正義曰鄭語云嬴伯翳之後地理志云嬴伯益之後則伯翳伯益聲轉字異猶一人也本紀云秦之先帝顓頊之苗裔孫曰女修女修織玄鳥隕卵女修吞之生子大業大業娶少典之子曰女華女華生太費太費與禹平水土又佐舜調馴鳥獸鳥獸多馴服是爲伯翳如本紀之言則益又名太費太費之父名太業列女傳曰皋子生五歲而佐禹曹太家注云

臯子臯陶之子伯益也然則臯陶大業一人也本紀
又云太費生子二人一曰太廉實鳥谷氏二曰若水
實費氏其玄孫曰費昌子孫或在中國或在夷狄費
昌當夏桀之時去夏歸商爲湯御以敗桀于鳴條太
廉玄孫曰孟戲中衍帝太戊使爲御而妻之自太戊
以下中衍之後遂世有功以佐殷國故嬴姓名顯遂
爲諸侯其玄孫曰中湣居西戎以保西垂生蜚廉蜚
廉生惡來惡來有力蜚廉善走父子俱以材力事紂
惡來有子曰女防女防生旁臯旁臯生太几太几生
太雒太雒生非子非子居犬丘好馬及畜善養息之

犬丘人言之周孝王孝王召使主馬于汧渭之間馬
犬蕃息孝王欲以大雒適嗣申侯之女爲太雒之妻
生子成爲適於是孝王曰昔伯翳爲舜主畜畜多息
今其後世亦爲朕息馬朕其分土爲附庸邑之秦使
復續嬴氏祀號曰秦嬴亦不廢申侯之女子爲大雒
適者秦嬴生秦侯立十年卒生公伯立三年卒生秦
仲是仲爲非子曾孫也秦仲立三年周厲王無道西
戎滅犬丘大雒之族周宣王卽位乃以秦仲爲大夫
誅西戎不克見殺長子莊公破西戎宣王與大雒大
丘之地爲西垂大夫莊公生子五人長曰世父世父

曰戎殺我大父仲我非殺戎王則不敢入邑讓其弟
襄公代立而將兵擊戎爲戎人所虜歲餘後歸其後
大戎弑幽王襄公將兵救周戰甚有功周避戎難東
徙洛邑襄公以兵送周平王王封襄公爲諸侯賜之
岐山以西之地封爵之於是始國與諸侯通使聘享
之禮廼用駢駒黃牛牝羊各三祠上帝西時僭端見
焉十二年伐戎而至岐卒生文公文公元年居西垂
宮三年文公以兵七百東獵四年至汧渭之會曰昔
周邑我先秦嬴于此後卒獲爲諸侯乃卜居之占曰
吉卽營邑之十年初爲鹿時

於鹿地作時

用三牢十三年

初有史以紀事民多化者十六年公以兵伐戎戎敗走遂收周餘民有之地至岐岐以東獻之周十九年得陳寶二十有二年法初有三族之罪二十七年伐南山大梓豐大特四十八年文公太子卒賜謚悼公文公卒悼公子立是爲寧公十二年卒子三長武公爲太子武公德公同母魯姬子生出子寧公卒大庶長弗忌威壘三父廢太子而立出子出子生五歲立六年三父等復令賊殺之而復故太子武公武公卒初以人從死死死者六十六人子一人名白白不立封平陽立其弟德公二年卒長子宣公立四年作密時

十二年卒子九人莫立立其次弟成公四年卒子七
人莫立立其少弟任好是爲穆公三十九年卒子罃
立是爲康公十二年卒子共公立四年卒子榮立二
十八年卒子景公立四十年卒子哀公立三十六年
卒太子夷公早死立夷公于是爲惠公九年卒子悼
公嗣十四年卒子厲共公立三十四年卒子躁公立
十四年卒立其弟懷公庶長毚與大臣圍懷公公自
殺懷公太子曰昭子早死乃立昭子之子是爲靈公
十三年卒子獻公名師隰不得立立靈公季父悼子
是爲簡公十六年卒子惠公立十三年卒子出子立

二年庶長改迎靈公之子獻公于河西而立之是爲
孝公二十四年卒子惠文王立二十七年卒子武王
立王好以力戲力士多至大官與孟說舉鼎絕脉而
卒無子諸弟爭立異母弟稷質於燕國人迎立之是
爲昭襄王五十六年卒子孝文王柱立一年立于莊
襄王立三年卒子政立是爲始皇○本紀直云伯翳
爲舜主畜不云能知禽獸之言地理志稱孝王云昔
伯益知禽獸是知其言語也僖二十九年左傳說介
葛盧聞牛鳴而知其音賈逵云伯益曉是術蔡邕云
伯翳綜聲于語鳥葛盧辨音于鳴牛是伯翳知禽獸

之言也○詩緯曰秦地仲秋之位其音舌舉而仰聲清而揚其音中商○嚴氏曰魏唐堯舜禹之故都也至是而風亦變則帝王風教中國禮義蕩然而戎狄乘之故次以秦中國將變于夷矣○吳季札曰此之謂夏聲夫能夏則大大之至也其周之舊乎○李氏曰鄭風都曼齊風闡緩秦風廉勁亦由風聲氣習使然其形諸聲音也秦獨大於諸國○嚴氏曰平以秦之救周而命之異日諸侯之憂生于所救事之倚伏可預料耶是故經國禦戎以自治爲上策○豐城朱氏曰按成與非子本兄弟也成之族旣爲大戎所滅

而非子之孫平仲復敗死于西戎則二戎者固秦之
世讎也幽王爲犬戎所殺則二戎者又非周之世仇
歟使平王而有志焉則于襄公之封宜命之糾合侯
伯統率師徒而討之則王轍可以不東戎難可以必
除而先王之仇亦可以少報矣旣不能然乃曰能逐
犬戎卽有岐豐之地夫岐豐之地興王之地也不惟
其土地人民之不可棄抑先王之墳墓在焉宗廟在
焉宮室之美官府之富在焉如之何可委而去也且
先王之封國有常制矣八百里之地封方百里者八
以開方計之則又不止于是矣而一旦舉而畀之秦

藉曰其地已爲犬戎所侵令其自取然秦能取之王不能率諸侯取之乎王而少有越王句踐之志必不若是忍矣故嘗謂平王之東也忘先王之仇而不報棄先王之土地人民而不恤舍先王之宗廟墳墓而不顧隳先王之典章法度而不守卒使興王八百里之地悉歸之秦則秦之代興不在他日而已兆諸此矣可勝嘆哉○鄧元錫曰余讀詩秦風嘆焉曰商風也夫秦僻遠在西翟襄公定王以王命得兼有岐雍穆公定晉雖無意于諸夏之會盟而據形便蓄力廣土恢恢乎有并吞囊括之風故春秋錄秦僅于吳楚

等而書錄秦誓詩秦風次魏唐知微也夫夫秦風西風也西風商風商風作蕩六合矣故終以水德并字

陳

譜曰陳者太皞宓義氏之墟帝舜之胃有虞闕父者爲周武王陶正武王賴其利器用與其神明之後封其子媯滿於陳都于宛丘之側是曰陳胡公以徇三恪說文妻以元女太姬其封域在禹貢豫州之東其地廣平無名山大澤西望外方東不及明音孟豬太姬無子好巫覡禱祈鬼神歌舞之樂民俗化而爲之五

傳至幽公當厲王時政衰大夫荒淫所爲無度國人傷而刺之變風作矣○左傳史趙云胡公不淫故周賜之姓使禪虞帝則胡公姓媯武王所賜以其有功也蓋舜本姚姓歷夏殷至周乃賜媯姓○漢書地理志云淮陽古陳國舜後胡公所封也○左傳哀元年稱夏后氏少康逃奔有虞虞思于是妻之二姚虞思在胡公前仍爲姚姓明是胡公始姓媯耳杜預云胡公闕父之子○三恪恪者敬也王者敬三代封其後○鄭駿異義云三恪尊於諸侯卑於二王之後則杞宋以外別有三恪謂黃帝堯舜之後也惟杜預云周

封夏殷二王後又封舜後謂之恪并二王之後爲三國其禮轉降示敬而已按樂記云武王未及下車封黃帝後于蓊封帝堯後于祝封帝舜後于陳下車乃封夏后于杞殷後于宋明陳與蓊祝爲三恪杞宋別爲二王之後矣○禹貢豫州云導沂澤被孟豬又曰熊耳外方至于陪尾注云屬豫州地理志外方卽嵩高山也明豬在梁國淮陽縣東北鄭居檜地在外方屬鄭宋都睢陽在明豬西南明豬屬宋也故檜譜云在豫州外方之北商譜稱宋西及豫州明豬之野是陳境不及外方明豬故無名山大澤○世家云胡公

卒子申公羣戾立卒弟相公犀羊立卒申公子突立
是爲孝公卒子慎公圉戎立卒子幽公寧立幽公十
二年周厲王奔于彘幽公卒子僖公孝立卒子武公
靈立卒子夷公說立卒弟平公燮立卒子文公圉立
卒長子桓公鮑立三十八年卒弟佗其母蔡女故蔡
人爲佗殺五父及桓公太子免而立佗是爲厲公厲
公娶蔡女數如蔡淫七年太子免之三弟長者名躍
中曰林少曰杵臼其令蔡人誘厲公以好女與蔡人
共殺厲公而立躍是爲利公利公者桓公子也利公
立五月卒立中弟林是爲莊公七年卒立少弟杵臼

是爲宣公宣公殺太子禦寇而立嬖子欵至四十五年宣公卒子欵立是爲穆公十六年卒子共公朔立十八年卒子靈公平國立君臣宣淫爲徵舒所弑國人立世子午是爲成公三十年成公卒子哀公弼立哀公元妃鄭姬生悼太子偃師二妃生子留妃生子勝二妃嬖留有寵屬諸司徒招與公子過公有廢疾三十五年招過殺太子偃師而立公子留偃師之子奔晉哀公縊于徵師楚公子棄疾立悼太子偃師之子吳是爲惠公二十四年卒子懷公柳立留卒于吳國人立公之子越是爲緡公二十三年楚白公勝

亂陳以其間侵楚二十四年楚公孫朝帥師來伐遂滅陳○按春秋桓五年春正月甲戌巳丑陳侯鮑卒左傳曰再赴也於是陳亂文公子佗殺太子免而代之則是佗自殺免非蔡人爲佗殺免也桓六年經云蔡人殺陳佗莊二十二年傳曰陳厲公蔡出也故蔡人殺五父而立之經云蔡人殺陳佗傳言蔡人殺五父則五父與佗一人不得云爲佗殺五父也六年殺佗十二年陳侯躍卒則厲公卽躍躍卽爲厲公無復利公矣馬遷誤以佗爲利公又稱躍爲利公檢春秋世次不得有厲公也遷蓋見公羊傳云陳佗潘于蔡

人蔡人殺之因傳會爲說云誘以好女而殺之據蔡人殺佗在桓六年世家言佗死而躍立五月而卒然則躍亦以桓六年卒矣而春秋躍卒桓十二年距佗之死非止五月皆史記之謬也○詩緯曰陳地處季春之位有山谷其土夷坦律中姑洗音中宮徵○嚴氏曰陳詩十而七爲淫靈公之事世變已極詩之時世訖于此錄之下于秦夷之也按周禮有巫覡之官相傳武王元女太姬好祭祀用史巫從嬀滿會王孫于豐以伐紂今鄆縣七里有胡公泉乃太姬治師之地也後封于陳太姬顯靜事神故其俗巫鬼世謂武

王亂臣十人有婦人焉不可指文母亦不可指邑姜
當數太姬可也○吳季札聞陳之歌曰國無主其能
久乎自鄆以下無譏焉○蘇氏曰陳之變風其原出
於太姬蓋列國之風皆有所自起方周之盛時王澤
充塞其善者篤于善不善者以禮自將亦不至于惡
其後周德旣衰諸侯各因其舊俗而增之善者因善
以入于惡而不善者日益甚故晉以堯舜之遺風爲
俗不中禮陳以太姬之餘俗爲遊蕩無度亦理勢然
也○歐陽氏曰陳最後至頃王時猶有靈公之詩○
疏義曰按陳檜曹皆小國故居變風之終又變風訖

于陳靈陳有靈公之詩亦宜居變風之終但檜比陳
爲尤小且有思治之詩故二國不可先陳而以陳列
于其前也○蘇氏集傳曰詩止于陳靈何也古之說
者曰王澤竭而詩不作是不然矣余以爲陳靈之後
天下未嘗無詩而仲尼有所不取也蓋亦嘗原詩之
所爲作者乎詩之所爲作者發于思慮之不能自己
而無與乎王澤之存亡也是以當其盛時其人親被
王澤之純其心和樂而不流于正焉發而爲詩則其
詩無有不善則今之正詩是也及其衰也有所憂愁
憤怒不得其平淫佚放蕩不合于禮者矣而猶知復

反於正故其爲詩也亂而不蕩則今之變詩是也及其大亡也然君而思叛越禮而忘反則其詩違義而無所歸嚮由是觀之天下未嘗一日無詩而仲尼有所不取也

檜

譜曰檜者古高辛氏火正祝融之墟國在禹貢豫州

外方之北滎波之南居溱洧之間

滎波孔氏以爲一水周禮職方其川

榮維其浸波滎則二水也差音詐

祝融氏名黎其後八姓惟妘音云姓

檜者處其地焉周夷厲時檜公不務政事而好潔衣服大夫去之于是檜之變風始作其國北鄰于號王

言集卷之七
肅云周武王封祝融後于濟洛河潁之間爲檜子○
楚世家云高陽生稱稱生卷章卷章生重黎爲高辛
氏之火正能光融天下帝嚳命曰祝融也然楚語稱
顓頊命南正重司天以屬神命火正黎司地以屬民
則黎爲火正高陽時也言高辛者歷高辛仍爲此職
也黎實祝融重爲南正世家以重黎爲祝融謬也尚
書鄭志荅趙商云火當爲北韋昭亦以火當爲北北
陰位以五行官有火正祝融則火官之號若天地之
官據陰陽之位對南正爲文則爲北正是黎一人居
二官○鄭語云祝融其後八姓已姓昆吾蘇顧溫苾

也董姓驪夷豢龍也彭姓彭祖豕韋諸姬也禿姓舟
人也舛姓鄢檜路偃陽也曹姓鄒莒也斟姓無後也
通楚爲芊姓楚世家云共工氏作亂帝嚳使重黎誅
之而不盡帝乃以庚寅日誅重黎而以其弟吳回爲
重黎後復居火正爲祝融吳回生子陸終陸終生子
六人曰會人會人卽檜之祖也故韋昭服虔皆曰檜
是陸終第四子求言後昭二十九年左傳云少皞氏
有子曰重顓頊有子曰黎史記以重黎爲一人謬○
譜云其地北鄰于號號有東西號杜預云西號在弘
農陝縣東南東號在今滎陽其東號鄭武公滅之西

號則晉獻公滅之○周語富辰曰號之亡由叔妘○
通典古鄆國有洧水鄆水○水經注竹書紀年晉文
侯二年王子多父伐鄆克之乃居鄭父之丘名之曰
鄭是曰桓公○嚴氏曰檜曹思周道習亂也檜世次
莫考詩不言何君曰夷厲之間者鄭譜也平王初鄭
武始滅檜前乎平何以知其非幽也當幽之時仲爲
檜君言不刺仲也前乎幽又何以知其非宣也周道
復興之時不得有匪風之思也非幽非宣夷厲當之
矣○張氏曰衛并邶鄘邶鄘之詩皆衛也晉并魏而
魏之詩非晉然其詩亦相附近何也其聲類也魏唐

皆儉故也鄭并鄆而鄆獨遠於鄭何也其聲不類也
自鄆以下所不足叙也以爲是相去也無幾耳故季
札觀樂于魯歌邶鄘衛則合之歌魏歌唐則別之歌
鄭歌鄆則遠之蓋因以爲識焉○史記解云斧小不
勝柯者亡昔有鄆君嗇儉減爵損祿羣臣卑讓上下
不臨禁罰不行重氏伐之檜君以亡○封爵世次未詳
曹

譜曰曹者禹貢兗州陶丘之北地名周武王既定天
下封弟叔振鐸于曹今濟陰定陶是也封域在雷夏
荷澤之野昔堯嘗遊成陽死而葬焉地理志濟陰成

陽縣有堯塚舜漁于雷澤民俗始化其遺風厚重多君子務稼穡薄衣食以致蓄積甲于魯衛之間又寡于患難末時富而無教乃更驕侈十一世當周惠王時政衰昭公好奢而任小人曹之變風始作○正義曰濟河惟兗州王肅云東南據濟西北距河禹貢又言導沅水東流爲濟入于河溢爲滎東出于陶丘北漢書地理志云濟陰定陶縣故曹國周武王弟叔振鐸所封禹貢陶丘在西南陶丘亭是也正義曰曹世家云叔振鐸卒子大伯腓立卒子仲君平立卒子官伯侯立卒子孝伯雲立卒子夷伯喜立卒弟幽伯強

立九年弟蘇弑幽伯代立是爲戴伯三十年卒子惠伯兕立三十六年卒子碩甫立其弟武攻之代立是爲繆公三年卒子桓公終生立五十五年卒子莊公射姑立三十一年卒子羈立戎侵曹曹羈出奔陳庶子赤歸于曹是爲釐公九年卒子昭公班立九年卒子共公襄立三十一年晉文公用狐偃之言伐曹數其不用僖負羈而乘軒者三百人執曹伯分曹衛之田以畀宋人曹伯之豎侯孺貨筮史得解復曹伯三十五年八月曹伯襄卒子文公壽立二十三年卒子宣公廬立十七年會諸侯伐秦卒于師公子負芻殺

其太子而自立是爲成公二十三年晉會諸侯同圍
齊曹伯卒于師子武公滕立二十七年武公卒于平
公須立四年春平公卒子悼公午立九年冬悼公朝
于宋宋囚之曹立其弟野是爲聲公五年聲公卒隱
公通立四年聲公之弟露弑隱公而自立是爲靖公
四年卒子伯陽立十五年春正月宋公伐曹將還褚
師子肥殿曹人詬之不行師待之宋聞之怒命反之
遂滅曹執曹伯陽及司城疆以歸殺之○太史公曰
余尋曹共公之不用僖負羈乃乘軒者三百人知惟
德之不逮及振鐸之夢豈不欲引曹之祀者哉如公

孫彊不修厥政振鐸之祀忽諸○詩緯曰曹處季冬之位土地勁險其聲清以急其音中徵○孔氏曰檜曹國小而君奢民勞而政僻季札之所不譏風次于末宜哉○陳氏曰檜亡東周之始也曹亡春秋之終也夫子刪詩繫檜曹于國風之後于檜之卒篇曰思周道也傷天下之無王也于曹之卒篇曰思治也傷天下之無伯也天下無王則政自諸侯出矣政出多門則強凌弱眾暴寡兼併之虐苛政之猛所以寤弊小國者可知此思周之詩所獨見于檜曹與○疏義云鄭衛淫僻齊陳荒穢王衰微秦強盛魏倫裔褊急

唐憂思深遠檜曹窮困而思治此諸國變風之大略也

幽

幽之字爲邠唐開元因改古文而爲幽也

本紀云舜封后稷于邠后稷卒子不窋立卒子鞠陶立卒子公劉立正義曰國語云昔我先世后稷以服事虞夏及夏之衰棄稷弗務我先王不窋用失其官而自窋于戎狄之間韋昭云幽西近戎北及狄自不窋時已窋戎地尚往來邠國至公劉而盡以幽民遷之也本紀云公劉卒子慶節立國于幽是也定國于邠自公劉始也其封域在禹貢雍州岐山之北原隰之野漢書地理志云右扶風栒邑縣有邠鄉杜預云

函在新平漆縣東北郃今始平武功縣所治釐城是也郃近而邠遠○金氏曰路史謂稷生豳蠻豳蠻生叔均自后稷至公劉十餘世按世本自公劉歷慶節皇僕差弗毀隃公非辟方高圉侯牟亞圉雲都太公組紆諸盤十有二世而生古公亶父史記以不窋爲后稷子而又缺辟方侯牟雲都諸盤四世遂謂后稷至文王爲十五世許氏曰稷契同時受封契至湯四百餘年而十四世稷至文王十五世其亦悞矣○正義曰七月一詩此乃遠論函公爲諸侯之政周公陳之欲以比序已志不美王業之本不得入周召之正

風又非刺美成王不得入成王之正雅周公王朝卿
不得專名一國進退既無所繫因其上陳幽公故爲
豳之變風○疏義曰邠不先二南尊文王也不繼二
南邠先岐後也不與王風相屬興衰非其類也文王
致治周公反正十五國風以是始終之則循環而爲
治世矣又曰周公之詩不入于雅風雅不同體也不
入于魯周公未嘗治魯也不自爲國王朝卿士不得
專名一國也○元城劉氏曰豳風何不編之魯魯者
伯禽封耳周公不之魯也何不編之雅與公劉相倫
公劉言政事七月言風俗風則不得入于雅矣○正

義曰春官箴章云吹箴以歌邠詩則周制之前已繫邠矣謂之變者以其變風變雅各述時之善惡七月陳豳公之政東山以下主述周公之德正是變詩美者故亦謂之變風也鴟鴞以下不陳邠事亦繫邠者尊周公之事使專一國也次之風後雅前者言周公德高于諸侯事司于王政處諸國之後不與諸國爲倫次之小雅之前言其近堪爲雅使周公專有此善也○鄭以爲周公避居之初是武王崩後三年成王年十三也居東二年罪人斯得成王年十四也迎周公反而居攝成王年十五也七年致政成王年二十

一也彼金縢注曰文王十五生武王九十七而終終時武王年八十三矣於文王受命爲七年後六年伐紂後二年有疾疾瘳後二年崩崩時年九十三矣周公以武王崩後三年出五年秋反而居攝四年作康誥五年作召誥七年作洛誥伐紂至此十六年也作康誥時成王年十八洛誥時年二十一也卽政時年二十二也然則成王以文王終明年生也○吳季札曰美哉蕩蕩乎樂而不淫其周公之東乎○黃氏震曰鄭氏以公子同歸以上爲邠風以介眉壽以上爲邠雅萬壽無疆以上爲邠頌周禮篇章逆暑迎寒吹

邠詩祈年于田祖吹邠雅祭蜡吹邠頌故鄭氏之分
如此王雪山謂一詩如何分三篇章所謂邠詩以鼓
鐘琴瑟四器之聲合籥也禮筮師吹竽笙塤箎簫籥
遂管春牘應雅凡十二器以雅器之聲合籥也禮眡
瞭播鞀擊頌聲笙磬凡四器以頌器之聲合籥也凡
爲樂器以十有二律爲之數度以十有二聲爲之齊
量凡和樂亦如之故逆暑迎寒祈年祭蜡皆全用七
月之詩特以器和聲不同耳至晦菴則有三說一說
邠詩吹之其調可風可雅可頌一說楚茨諸詩是邠
之雅噫嘻諸詩是邠之頌一說王介甫謂邠自有雅

頌今皆亡矣愚按楚茨諸詩于今爲刺幽王詩噫嘻
諸詩於今爲成周郊社詩未易遽指爲邠若介甫謂
邠詩別自有雅頌則邠乃先公方自奮于戎狄之地
此時得有天子雅頌耶○按周禮逆暑迎寒則曰邠
詩不曰邠風若邠雅頌亦邠詩之謂也但所擊之節
有風雅頌之不同耳○嚴氏曰周南召南邠鄘衛王
鄭齊豳秦魏唐陳鄘曹季札所觀太師樂歌之次第
也周召邠鄘衛檜鄭齊魏唐秦陳曹邠王鄭氏詩譜
次第也今詩之次第孔子所定也降秦于唐而以邠
終之蓋一經聖人之手而旨趣深矣○范氏曰邠居

風雅之中何也風之所爲終而雅之所爲始也言周之所以盛者由周公也

黎

呂氏春秋武王封帝堯之後于黎○鄭氏曰黎在衛西○孔氏曰杜預云黎侯國上黨壺關縣有黎亭是在衛西也或云卽黎氏國侯爵西伯戡黎卽此與紂都接今潞州東十八里有故黎侯城封建考云西伯戡黎武王復以封湯後黎侯豐舒奄之有黎氏牟氏六韜決大疑云甲子武王封湯後于黎殷後于宋三百以爲殷社黎牟也卽黎陽○名物疏按黎陽縣今

廢在直隸大名府清縣西二里黎縣卽廢臨河縣在
大名府開州西六十里衛泥中邑卽此地也中露古
人所未詳潞州屬山西上黨縣今省入州壺關黎城
二縣並屬潞州黎侯城在黎城縣東北十八里左傳
宣十五年晉侯將伐潞伯宗曰狄有五罪棄仲章而
奪黎氏地其三也荀林父敗赤狄于曲梁辛亥滅潞
秋七月壬午晉侯治兵于稷以略狄土立黎侯而還
依此文則滅黎者赤狄也其事當衛穆公之世此詩
不當序于宣公之前毛鄭不云耶以傳疑耳

邢

邢姬姓侯爵地在廣平襄國縣隋改曰龍岡今邢州
閔公元年狄人伐邢管敬仲言于齊侯請救邢以從
簡書齊人救邢僖公元年齊師及諸侯救邢邢人潰
出奔師遂逐狄人具邢器用而遷之師無私焉夏邢
遷于夷儀諸侯城之十八年邢人狄人伐衛十九年
衛人伐邢以報兔圃之役于是衛大旱卜有事于山
川不吉甯莊子曰昔周饑克殷而年豐今邢方無道
諸侯無伯天其或使衛討邢乎從之師興而雨二十
年齊狄盟于邢爲邢謀衛難也于是衛方病邢二十
四年衛人將伐邢禮至曰不得其守國不可得也我

請昆弟仕焉乃往得仕二十五年春衛人伐邢二禮
從國子巡城掖以赴外殺之正月丙午滅邢禮至爲
銘曰余掖殺國子莫余敢止

譚

譚姓未詳子爵國在濟南平陵縣今齊州歷城莊公
十年齊侯之出也過譚譚不禮焉及其入也諸侯皆
賀譚又不至冬齊師滅譚譚子奔莒○一統志譚城
在山東濟南府城東七十里古譚子國漢置譚城縣
○郡國志東平陵有譚城通典齊州全節縣春秋時
譚國城在縣西南白虎通作單

申

申姜姓侯爵其先神農之後爲唐虞四岳受封于申國在南陽宛縣今信陽軍宣王時入爲王卿士出爲南方侯伯其後幽王廢申后及太子申侯怒遂與繒西夷犬戎攻殺幽王驪山下虜褒姒魯莊公六年楚武王伐申過鄧十八年楚文王與巴人伐申而驚其師其後遂爲楚所滅○周語富辰曰齊許申呂由太姜故申城在鄧州南陽縣北二十里林氏曰秦漢之際南陽爲要地楚有圖北方之志其君多居于申合諸侯又在焉子重請申呂爲賞田巫臣曰不可此申

呂所以邑也是以爲賦以禦北方若取之是無申呂也晉鄭必至于漢申卽宛也方城之險楚所恃而申在方城之內冥阨之險又在方城之外○地里志南陽郡宛縣故申侯國○箋云平王母家申國在陳鄭之南迫近強楚○鄭語史伯曰當成周者南有申呂○列國史補曰按申伯爲蕃翰于宣王之時及幽王廢申后而申侯召犬戎伐周弑王然則以世考之召戎弑君之申侯卽爲蕃翰者之子也平王方且遣兵戍申以召譏刺蓋申侯忘父之忠而召犬戎以禍王室平王復忘父之仇而勤王師以戍母家皆非善繼

志之孝子也

甫

甫卽呂也書呂刑孔氏注呂侯後爲甫侯故或稱甫刑○唐世系表云宣王世改呂爲甫○史記云呂尚先祖爲四岳佐禹治水有功虞夏之際受封于呂徐廣云呂在宛縣○玉海云郡國志汝南新蔡有大呂亭故呂侯國輿地廣記蔡州新蔡縣古呂國今以左傳考之楚有申呂時新蔡屬蔡非楚邑當以在宛縣爲正○一統志呂城在南陽府西三十里虞夏時封呂望先祖于此今名董呂村

許

許姜姓男爵出自堯四岳伯夷之後周武王封其苗裔文叔于許以續大岳之嗣地在潁川許昌縣今許州是也國夾于晉鄭齊楚大國之間侵陵不息春秋魯隱公十一年公會齊侯鄭伯伐許許莊公奔鄭齊侯以許讓公公不可以與鄭人鄭伯使許大夫百里奉許叔以居許東偏使公孫獲處許西偏佐許莊公二十九年鄭人侵許僖公四年會齊侯及諸侯之師侵蔡伐楚次于陘許穆公卒于師葬之以侯禮六年齊侯及諸侯之師伐鄭秋楚子圍許以救鄭諸侯救

牛乃還冬蔡穆侯將許僖公以見楚子于武城許男
面縛啣璧大夫衰經士輿襯二十三年晉陳鄭伐許
討其貳于楚也文公五年許僖公卒三年許恃楚而
不事鄭鄭子良伐許四年鄭公孫申帥師疆許田許
人敗諸展陂鄭伯伐許取鉏任泠敦之田晉欒書帥
師救許伐鄭取范祭楚子反救鄭鄭伯與許男訟焉
皇戌攝鄭鄭伯之辭子反不能決也五年許靈公想
鄭伯于楚八月鄭悼公如楚訟不勝楚人執皇戌及
子國故鄭伯求成于晉八年晉欒書侵蔡遂侵楚侵
沈鄭伯將會晉師門于許東門大獲焉九年鄭伯如

晉晉人討其貳于楚執諸銅鞮冬鄭人圍許示晉不急君也是則公孫申謀之曰我出師以圍許爲將改立君者而紿晉使晉必歸君十四年八月鄭子罕伐許敗焉戊戌鄭伯復伐許入其郛許人平以叔申之封十五年許靈公畏偪于鄭請遷于楚辛丑楚公子申遷許于葉襄公三年許靈公事楚不會于雞澤晉智武子帥師伐許十六年許男請遷于晉晉以諸侯會溴梁遂遷許許大夫不可晉人歸諸侯鄭子蟜聞將伐許遂相鄭伯以從諸侯之師師次于栲林伐許次于函氏晉荀偃帥師伐楚敗楚師旣而遂侵方城

之外復伐許而還二十六年許靈公如楚楚請伐鄭曰
師不興孤不歸矣八月卒于楚楚子曰不伐鄭何以
求諸侯十月楚子伐鄭入南里墮其城涉于汜而歸
然後葬許靈公昭公四年許男如楚楚子止之遂止
鄭伯復田江南許男與焉使椒舉如晉求諸侯二君
待之楚以諸侯滅賴遷賴于鄢楚子欲遷許于賴使
聞韋龜與公子棄疾城之而還九年楚公子棄疾遷
許于夷實城父取州來淮北之田以益之伍舉授許
男田然丹遷城父人于陳以夷濮西田益之遷方城
外人于許十八年楚左尹王子勝言于楚子曰許于

鄭仇敵也而居楚地以不禮于鄭晉鄭方睦鄭若伐
許而晉助之楚喪地矣君盍遷許許不專于楚鄭方
有令政許曰余舊國也鄭曰余俘邑也葉在楚外之
蔽也土不可易國不可小許不可俘讎不可啓君其
圖之楚子說使王子勝遷許于葉實白羽十九年許
悼公瘞飲太子止之藥卒太子奔晉定公四年許遷
于容城六年鄭遊速帥師伐許以許男斯歸因楚敗也

解

左傳郇文之昭也毛氏云郇伯郇侯鄭氏云文王之
子爲州伯○水經注涑水又西逕郇城春秋什地解

縣西北有郇城服虔郇國在解縣東瑕氏墟也郡縣志
栒邑故城在邠州三水縣東卽漢栒邑屬右扶風古
郇國也古豳城在縣西三十里公劉始都處○左傳
盟于郇○竹書紀年秦穆送重耳圍令狐桑泉曰衰
至廬柳退次舍于郇桑泉曰衰竝在解東南明不至
解今解故城東北二十四里有故城在猗氏故城
西北鄉俗名郇城與服說符○一統志山西平陽府
猗氏縣古郇國文王子所封後爲晉令狐地

褒

褒國姁姓夏同姓所封輿地廣記輿元府褒城縣故

褒國水經注石門在漢中西褒州北褒水又東南歷褒口卽褒谷南口也北口曰斜褒水又南逕褒縣故城東褒中縣也本褒國又南流入于漢南鄭縣故褒附庸周顯王時蜀有褒漢地後併于楚○晉語周幽王伐有褒鄭語褒人褒胸○一統志陝西漢中府褒城縣在府城西北四十五里古褒國漢置褒中縣地在褒谷中故名

蘇

蘇姓未詳按鄭語已姓昆吾之後孔氏曰左傳昔周克商使諸侯撫封蘇忿生于溫爲畿內之國則蘇國

在溫杜預曰今河內溫縣春秋時蘇緡子又云蘇成
公者葢子爵而爲三公司寇也隱公十一年王取鄆
劉薦邦之田于鄭而與鄭人蘇忿生之田溫原緡樊
隰郕攢茅向盟州陘隤懷莊公十九年薦國邊伯石
速詹父子禽祝跪作亂囚蘇氏秋五大夫奉子頹以
伐王不克出奔溫蘇子奉子頹以奔衛衛燕伐周納
子頹僖公十年狄滅溫蘇子無信也蘇子叛王卽狄
不能于狄狄人伐之王不救故滅蘇子奔衛文公十
年及蘇子盟于女栗頃王立故也

暴

暴或云畿內國春秋文公八年公子遂會雒戎盟于
氏注鄭地○朱氏曰戰國及漢時多有暴姓者
史補云按周召劉單祭凡蘇毛皆王畿內之國世
爲王卿士先王之時諸侯之有功德者則入輔王室
如成王時召太保芮伯彤伯畢公衛侯毛公爲六卿
召畢毛皆兼三公齊侯呂伋爲任虎賁後來如衛鄭
二公亦入爲王卿士皆外諸侯也東遷而後王室微
弱號令不能行于畿外春秋之初鄭與虢尚迭爲卿
士然爭政怨怒至于交質交惡稱兵構逆而名義蕩
然矣其後虢爲晉滅鄭亦不復聽命齊晉迭伯而列

國所爲奔走先後者知有盟主而已王室之政付之畿內食邑之小國然溫已叛去其地入于狄與晉惟周召劉單世執王室之政柄云

摯

周語摯疇之國由太任注云摯疇二國奚仲仲虺之後太任之家○唐書世系表云祖已七世孫曰成徙國于摯仲虺居薛臣扈祖已皆其胄裔○傳氏曰自彼殷商來嫁于周則摯是殷商畿內國○國名記云蔡之平輿有摯亭○一統志云平輿故城在河南汝寧府城東

言部類二
莘

世本云莘妘姓禹後○米經注郃陽城故有莘邑太
妘之國括地志古新女國城在同州河西縣南二十
里莘禹後○唐世系表啓封友于于莘○國名記云
今祠之夏陽漢郃陽有太妘冢城祠廟昔散宜生求
有莘氏美女獻紂周代有神降之本號地大名之莘
縣有莘亭亦國也齊蔡管城陳畱俱有莘○一統志
莘城在西安府郃陽縣南二十里本莘國

虞芮

括地志云故虞城在陳州河北縣東北五十里虞山

之上古虞國古芮城縣西二十里古芮國閒原在河北縣西六十五里○晉太康地記云虞西百四十里有芮城○郡縣志云閒原在平陸縣卽虞芮爭田讓爲閒田之所○史記注引地里志云虞在河東太陽縣芮在馮翊臨晉縣正義云注引芮在臨晉者恐踈閒原在河東與虞芮相接臨晉在河西同州非臨晉芮城明矣○一統志平陸縣在山西平陽府解州東南九十里芮城縣在州西南九十里閒田在平陸縣西五十里卽虞芮相讓之地俗呼讓畔城

密

傳云密須氏○地里志安定郡陰密縣詩密國○國
名記子爵世本云商有密須文王伐之魯有密須之
鼓杜預謂姑姓國在安定陰密今涇之靈臺也史索
云是河南密九域志以爲鄆之致密城皆非○一統
志陝西平涼府涇州靈臺縣在州城南九十里古密
須之國○書傳云文王受命三年伐密須○皇甫謐
云文王問太公吾欲用兵孰可太公曰密須氏疑于
我我可先伐之管叔曰不可其君天下之明君伐之
不義太公曰臣聞先王之伐也伐逆不伐順伐險不
伐易文王曰善遂侵阮徂共而伐密須密須之人自

縛其主而歸文王○括地志陰密故城在涇州鶉孤縣西有東接縣城卽古密國○周語共王遊涇密康公从○左傳密須之鼓與其大路文所以蒐也

阮共

箋云阮也徂也共也三國犯周文王伐之○孔氏云毛以徂爲往阮共爲周地密須所侵也○魯詩說云阮徂共皆國名○張氏云阮國名共阮國之地名皆在今涇州今有共池卽共也○名族略云阮諸侯國在岐渭之間

旅

傳云旅地名疏云毛意以旅爲周地○孟子疏云大雅曰以遏徂旅孟子徂莒者案春秋書莒子盟于密則莒密之近地詩言密之衆孟子言密之地其旨同也○左傳注云莒今陽城莒縣城陽淳于縣東北有密鄉○名物疏按古莒國今山東青州府莒州漢之城陽國也去密須殊遠孟子疏非

崇

一統志陝西西安府鄠縣夏時扈國殷爲崇國○史記崇侯虎譖西伯于紂紂囚西伯于羑里後放西伯受命元年伐犬戎明年伐密須明年敗耆國明年伐

邗明年伐崇侯廩而作豐邑○宣公元年晉欲求成于秦謀侵崇以致秦救而求成焉冬趙穿侵崇秦弗與成恐非文王所伐崇也

郃

毛氏曰姜嫄之國○郡縣志故鰲城一名武功城在京兆府武功縣西南二十二里古郃國也左傳作駘按左傳魏駘芮岐畢吾西土也注云后稷受此五國駘在武功縣治鰲城○郡國志右扶風郃縣有郃亭○郡縣志秦孝公作四十一縣鰲城武功各一鰲與郃音同武功蓋謂水南今郃縣地是也○史樊噲攻

雍釐城注云卽后稷所封釐城在武功縣西南二十里古有釐亭久廢

凡

凡姬姓伯爵周公之後國于畿內在汲郡共縣今衛州有共城縣東南有凡城通典凡國在衛州黎陽縣郡縣志在衛州共城縣西二十里世爲王卿士幽厲時凡伯作板瞻卽召旻諸詩以刺王隱公七年戎朝于周發幣于公卿凡伯弗賓冬王使凡伯來聘還戎伐之于楚丘以歸

芮

芮姬姓伯爵國在馮翊臨晉縣芮鄉今陝州芮城縣
○武王巢伯來朝芮伯作旅巢命成王時芮伯爲司
徒與太保彤伯畢公衛侯毛公同受顧命立康王○
厲王說榮夷公芮良夫諫○桓公三年芮伯萬之母
惡芮伯之多寵人也故逐之出居于衛四年秋秦師
侵芮敗焉小之也冬王師秦師圍魏執芮伯以歸九
年秋虢仲芮伯梁伯荀侯賈伯伐曲沃十年秋秦人
納芮伯萬于芮○夾涿鄭氏曰芮後爲晉所滅

韓

韓姬姓周武王之子也左傳邢晉應韓武之穆也後

爲晉所滅其苗裔事晉得封于韓原曰韓武子卽韓萬也○古史曰韓之先獻子厥最賢然春秋之際賢大夫如獻子者多矣而子孫莫興太史公以獻子存趙氏之孤爲天下之陰德故宜有後余謂不然韓之先與晉同祖皆周武王後也史伯謂鄭桓公武公實昭文之功文之祚盡武其嗣乎武王之子應韓不在其晉乎晉自文公伯諸侯至于八世猶未足以究武之烈而繼之以韓此天意也獻子何足以當之然周衰姬姓復興者三國燕與韓魏皆據地千里后稷播種百穀以濟饑饉其報固當然哉

魯

列國史云成王封周公元子伯禽于少昊之墟分以大輅大旂夏后氏之璜封父之繁弱殷民六族條氏徐氏蕭氏索氏長勺氏尾勺氏分以土田陪敦祝宗卜史備物典策官司彝器俾侯于魯以輔周室次子留相王室代爲周公其餘小國者六人凡蔣邢茅胙祭○鄭譜曰魯者少昊摯之墟也帝王世紀少昊邑于窮桑以登帝位國中有大庭氏之庫則大庭氏亦居于徙都曲阜縣東北六里此乎魯封域在禹貢徐州大野蒙羽之野自后政衰國事多廢十九世至僖公當周之惠襄王時而遵伯

禽之法十六年會諸侯于淮上東路公遂伐淮夷

孔氏

曰經傳

二十年新作南門又修姜嫄之廟至于復魯

舊制未徧而薨國人美其功季孫行父請命于周而作其頌○括地志兗州曲阜縣漢爲魯縣外城卽伯禽所築古魯城高皇帝舉兵誅項藉圍魯魯中諸儒尚講誦習禮樂絃歌之音不絕豈非聖人之遺化好禮樂之國哉夫齊魯之間于文學自古以來其天性也○劉公幹魯都賦載武器于有炎之庫放戎馬于巨野之垆○詩史前編云魯公三傳至幽公宰弟魏公潰弑之而自立時周昭王時也金履祥曰弑君爭

國之禍自是始而王不能討失政甚矣未幾南征不復周人諱而不赴而穆王終不能討卒釀春秋戰國篡弑之禍故朱子謂周綱陵夷自昭王始

世次

伯禽封四十六年子考公立卒弟煬公立卒子幽公立弟潰弑之而自立是爲魏公卒子厲公立卒弟獻公立卒子眞公立卒子武公立武公當宣王時入朝王愛其少子戲欲立爲魯世子樊仲山南諫不聽宣王竟立戲武公歸而卒戲嗣是爲懿公九年兄括之子伯御與魯人弑懿公伯御立二年周宣王來伐殺

伯御問諸公子能道順諸侯者乎樊穆仲曰魯懿公
弟稱肅恭明神敬事耆老賦事行刑必問于遺訓而
咨于故實不干所問不犯所知宣王曰然能訓治其
民矣乃立稱是爲孝公二十七年卒子弗湮嗣是爲
惠公公繼室聲子生息姑復以仲子手文之異生子
允以爲世子公卒允少長子息姑攝主國事是爲隱
公公子翬請殺子允將以求太宰公不從反譖公于
允而請弑之使賊弑公爲大夫之家立桓公而以弑
君之罪加討于爲氏十八年與夫人姜氏如齊齊侯
通焉而使公子彭生乘公公薨于車世子同嗣是爲

莊公公卒立黨氏所生子般慶父力也慶父通于哀
姜欲立哀姜嫡子開使圉人華賊殺子般于黨氏而
立于開是爲閔公慶父復使卜斷弒公季友立公子
申是爲僖公三十三年乙巳公薨于小寢子與嗣是
爲文公十八年二月丁丑公卒于臺下文公二妃夫
人姜氏生子惡及視敬嬴生倭敬嬴嬖而私事公子
遂而屬倭于遂遂請于齊侯殺惡及視而立倭是爲
宣公十八年冬十月壬戌卒於路寢子黑肱嗣是爲
成公卒子午嗣是爲襄公三十一年公作楚宮死焉
立胡女敬歸之子子野卒毀也立敬歸之姊齊歸之

子公子稠是爲昭公比及葬三易衰襚如故是時
昭公十九年矣猶有童心二十二年公薨于乾侯立
定公定公襄公之子昭公之弟也立十五年卒于高
寢子蔣嗣是爲哀公公患三桓之侈也欲以諸侯去
之三桓亦患公之妄也故君臣多間公欲以越伐魯
而去三桓遂如公孫有陘氏孫于邾因遂如越三桓
乃立哀公子寧是爲悼公國人迎公復歸終卒于有
山氏三十年悼公卒子嘉立是爲元公二十一年卒
子顯立是爲繆公三十三年卒子奮立是爲共公二
十一年卒子屯嗣是爲康公九年卒子圉嗣是爲景

公二十九年卒子叔立是爲平公二十二年卒子賈
嗣是爲文公二十三年卒子僻嗣是爲頃公十九年
楚人遷魯于莒而取其地二十五年楚考烈滅魯遷
其君于卞爲家人卒于柯魯起周公至頃公凡三十
四世○太史公曰余聞孔子曰甚矣魯道之衰也洙
泗之間斷斷如也觀慶父叔牙閔公之際何其亂也
隱桓之事襄仲殺適立庶三家北面爲臣親攻昭公
昭公以奔至其揖讓之禮則從矣而行事何其戾也
○古史曰魯自宣公殺其世子而自立公室遂卑三
桓分有其民而竊咻之民知有大夫而不知有君矣

公二十九年季武子取卞公還自楚不敢入歸而不敢問蓋魯君之失國也必矣昭公不忍其詞未能收民而舉兵攻之遂以失國哀公卑弱甚于昭公又欲以越人攻之終亡出死于越孔子曰禮樂征伐自諸侯出十世希不失矣自大夫出五世希不失矣陪臣執國命三世希不失矣自隱至昭而逐于季氏凡十世自宣至定而制于陽虎凡五世虎不逾世而敗自是三桓微沒不復見魯公室雖微不絕遂與戰國相終始蓋以臣僭君不義而得民要以其力而自致君雖失衆而其實無罪久則民將哀之其勢固當然哉

商

書序自契至成湯八遷孔氏曰契居商昭明居砥石

相土居商丘湯居亳見經傳四其四未聞商在商州

石或曰卽砥柱在陝州陝縣商丘應天府宋盤庚曰

不常厥邑于今五邦孔氏注湯遷亳湯卽位居南亳

南府偃師縣西十里仲丁遷囂滎陽故城在鄆州滎澤

四里本帝嚳之墟河亶甲居相在相州內黃縣祖乙居耿在絳州龍

十四里并盤庚遷都殷爲五邦蔡氏曰考之盤庚之

前當自有五遷史記言祖乙遷邢或祖乙兩遷也武

乙去亳徙河北世紀帝乙徙朝歌○三亳皇甫謐曰

二在梁國

一在河洛之間穀熟爲南亳湯所都也蒙爲北亳亦曰景亳湯所受命也偃師爲西亳盤庚所遷也黃氏曰三亳南亳北亳亳殷也南亳今應天府穀熟縣北亳杞州考亭縣亳殷河南偃師縣補傳三亳皆湯所居也

有娥

呂氏春秋有娥氏有佚二女爲九成之臺○淮南子有娥在不周之北長女簡狄少女建疵○史記桀敗于有娥之墟正義云當在蒲州○國名記云帝嚳次妃國桀敗有娥之墟蓋陝號間

韋

鄭語祝融其後八姓彭姓豕韋○通典滑州韋城縣

古豕韋國○國名記云彭姓商伯元喆之封豕韋也
○一統志直隸大名府滑縣古豕韋氏之國廢韋城
縣在縣東南五十里

顧

郡縣志顧城在濮州范縣東二十八里夏之顧國故
莘城在汴州陳留縣東北三十五里古莘國地湯伐
桀桀與韋顧之君拒湯於莘之墟遂戰于鳴條之野
○一統志顧城在山東東昌濮州范縣東南五十三
里

昆吾

國語祝融後已姓昆吾爲夏伯注云昆吾祝融之孫
陸終第二子名樊爲已姓封昆吾昆吾衛是也後夏
衰爲伯遷于舊許傳曰楚之皇祖伯父昆吾舊許是
宅○括地志濮陽縣古昆吾國故城縣西三十里昆
吾臺在縣西百步周圍五十步高二丈卽昆吾墟也
○左傳昭十八年二月乙卯周毛得殺毛伯過萇弘
曰是昆吾稔之日也○寰宇記解州安邑縣有昆吾
亭蓋湯伐桀之時昆吾以兵助桀同時而滅故有亭
非國于此○一統志東昌府濮州古顓頊之墟曰帝
丘夏爲昆吾氏所居

夏

寰宇記禹自安邑都晉陽桀徙安邑○書序孔氏注
桀都安邑湯升道从阨阨在河曲之南戰于鳴條之
野地在安邑西○一統志山西平陽府解州安邑縣
禹管安邑卽此地鳴條岡在縣北二十里境接夏縣
楚

春秋正義荆楚一木二名故以爲國號亦得二名莊
公之世荆皆書荆僖之元年乃書楚人伐鄭蓋始改
爲楚○疏云周始封熊繹爲楚子武丁之世不知楚
君爲何人○左傳楚國方城以爲城漢水以爲池○

諸綱類考

列國卷七

北

一統志方城山在河南南陽府裕州東北